



*Les enfans d'Israël ne pouuans supporter les outrages qui leur estoient faits ,  
ont recours à Dieu par humbles prieres.*

**L**E S Egyptiens continuans leur tyrannie & mauuais vouloir contre le peuple Israëlite, leur imposans charges & sur-charges, les faisoient trauailler en choses penibles & rudes; & les tenoient en telle seruitude, qu'il n'y auoit entr'eux que soupirs, regrets & pleurs: car le Roy qui auparauant les auoit receu & fauorisé pour l'amour de Ioseph, estoit mort, & la race du tout changée; partant ils n'auoient autre recours qu'à Dieu, auquel ils adresserent leur humble priere, difans: Seigneur aye souuenance des promesses, & alliance que tu fis jadis à nos peres, Abraham, Isaac, & Iacob, par toy ratifiée d'aage en aage à nos deuanciers. Parquoy, ô Seigneur nostre Dieu, deliure-nous des seruitudes Egyptiennes, à ce qu'ils ne nous tourmentent plus par batitures, mocqueries, & exactions insupportables. Dieu donc ouït leur clameur, & eut memoire de son alliance, & proposa lors donner deliurance aux afflictions des enfans d'Israël, qui estoient affligez entre les Egyptiens.